



武元衡集卷上

五言古詩

古意

蜀國春與秋岷江朝夕流長波東接海萬里至揚  
州開門面淮甸楚俗饒歡宴舞榭黃金梯歌樓白  
雲面蕩子未言歸池塘月如練

塞下曲

草枯馬蹄輕角弓勁如石驕虜初欲來風塵暗南  
國走檄召都尉星火勦羗狄吾身許報主何暇避  
鋒鏑白露濕鐵衣半夜待攻擊龍沙早立功名向

燕然勒

獨不見

荆門一柱觀楚國三休殿環珮仰神仙輝光生顧  
盼春風細腰舞明月高堂宴夢澤水連雲渚宮花  
似霰俄驚白日晚始悟炎涼變川鳥異波濤離鴻  
分海縣南北斷相聞嘆嗟獨不見

旬假南亭寄熊郎中

旬休屏戎事涼雨北窓眠江城一夜雨萬里繞山  
川草木散山氣池塘鳴早蟬妍芳落春後旅思生  
秋前紅槿報庭艷綠蒲繁渚煙行歌獨謔酌坐發

朱絲絃哀生不可扣華燭徒湛然聞君樂林臥郡  
閣曠周旋酬對龍象侶泛注清泠泉如何無礙智  
尤苦病纏牽

晨興寄贈竇使君

江陵歲方晏晨起盼庭柯白露傷紅葉清風斷綠  
蘿徇時真氣索念遠懷憂多夙昔樂山意縱橫南  
浦波有美嬋娟子百慮攢雙蛾緘情鬱不舒幽行  
駢復羅爲子歌苦寒酌酒朱顏酡世事浮雲變功  
名將柰何

秋日對酒

行年過始衰秋至獨先悲事往憐神魄感深滋涕  
洩百慮紛然在一醉兀無思寶瑟拂塵匣徽音疑  
朱絲幽圃蕙蘭氣煙窓松桂姿我之濟時略杖節  
撫藩維山川大兵後牢落空城池驚沙猶振野綠  
草生荒陂物變風雨順人懷天地慈春耕事秋戰  
戎馬去封陲波瀾暗超忽堅白亦磷緇客有自嵩  
穎重徵棲隱期丹訣學仙晚白雲歸谷遲君恩不  
可報霜露繞南枝

安邑里中秋懷寄高員外

原憲素非貧嵇康自寡欲守道識通窮達命齊榮

辱庭梧變葱蒨籬菊揚芳馥墜葉翻夕霜高堂  
華燭况茲寒夜永復歎流年促感物思殷勤懷賢  
心躑躅雄詞封禪草麗句陽春曲高德十年兄異  
才千里足咫尺邈雪霜相望如瓊玉欲識歲寒心  
松筠更秋綠

送唐次

都門去馬嘶灞水春流淺青槐驛路長白日離尊  
晚望望煙景微草色行人遠

七言古詩

秋夜雨中懷友

庭空雨鳴驕天寒鴈啼苦青燈淡吐光白髮悄無  
語幾年不與聯牀吟君方客吳我猶楚

望夫石

佳名望夫處苔蘚封孤石萬里水連天巴江暮雲  
碧湘妃泣下竹成斑子規夜啼江樹白

行路難

君不見道傍廢井傍開花原是昔年驕貴家幾度  
美人來照影濯纈笑引銀瓶綆風飄雨散今柰何  
繡闥雕甍綠苔多笙歌鼎沸君莫矜豪奢未必長  
多金休說編氓朴無耻至境終湏合天理非故敗

他却成此蘇張終作多言鬼行路難路難不在九  
折灣

長相思

長相思隴雲愁單于臺上望伊州鴈書絕蟬鬢秋  
行人 畔暮雨海西頭殷勤大河水東注不還  
流

出塞作

夙駕逾人境長驅出塞垣邊風引去騎胡沙拂征  
轅奏笳山月白結陣瘴雲昏雖云風景異華夏  
地理通樓煩白羽矢飛先火礮黃金甲耀奪朝

嗽要須灑掃龍沙淨歸謁明光一報恩

桃源行送友

武陵川徑入幽遐中有雞犬秦人家  
家家傍流水多桃花桃花兩邊種  
來又流水一道何時有垂條落  
蓋暗春風夾岸芳菲至山口歲歲  
年年能寂寥林下青苔日為厚  
時有仙鳥來啣花曾無世人此  
攜手可憐不知若為名君往從  
之多所更古驛荒橋平路盡崩  
湍恠石小溪行相見維舟登覽  
處紅堤綠岸宛然成多君此去  
從仙隱令人晚節悔營營

長安叙懷寄崔十五

延首直城西花飛綠草齊  
迢迢隔山水悵望思遊子  
百轉黃鸝細雨中千條翠柳  
衡門裏門對長安九衢路  
愁心不惜芳菲度風塵冉冉  
秋復春鍾鼓喧喧朝復暮  
漢家宮闕在中天紫陌朝臣  
車馬速蕭蕭霓旌合仙仗  
悠悠劍佩入爐煙李廣少時  
思報國終軍未遇敢論邊  
無媒守儒行榮悴紛相映  
家甚長卿貧身多公幹病  
不知身病竟如何懶向  
青山眠薜蘿雞黍空多元  
伯惠琴書不見子猷過  
超名累歲與君同自歎還  
隨鷓退風聞說唐生子  
孫在何當一為問窮通

兵行褒斜谷作

古地接龜沙邊風送征鴈霜明草正腓峰逼日易  
晏集旅布嵌谷驅馬歷層澗岷河源涉屢蜀甸途  
行慣矢橐孤室豈領軍儋爵食祿由從宦注意奏  
凱赴都畿速令提兵還石坂三川頓使氣象清賣  
刀買犢消憂患

五言長篇

古今調

奉和聖製豐年多慶九日示懷

令節寰宇泰神都佳氣濃賡歌禹功盛擊壤堯年  
豐九奏碧霄裏千官皇澤中南山澄凝黛曲水清

涵空金玉美王度歡謠康國風睿文垂日月永與  
天無窮

夏日陪馮許二侍郎與嚴秘書遊昊天觀  
覽舊題寄同里楊華州中丞

三伏草木變九城車馬煩碧霄迴騎射丹洞入桃  
源臺殿雲浮棟綉纓鶴在軒莫將真破妄聊用靜  
持喧石甃古苔冷水筠涼簟翻黃公壚下歎旌旆  
國東門

奉和聖製重陽日即事

玉燭降寒露我皇歌古風重陽德澤展萬國歡娛

同綺陌擁行岐香塵凝曉空神都自藹藹佳氣助  
惹惹律呂陰陽暢景光天地通徒然被鴻霈無以  
報玄功

秋日臺中寄懷簡諸僚

憲府日多事秋光照碧林千雲巖翠合布石地苔  
深憂悔耿遐抱塵埃緇素襟物情牽跼促友道曠  
招尋頽節風霜變流年芳景侵池荷足幽氣煙竹  
又繁陰簪組赤墀戀池魚滄海心滌煩滯幽賞永  
度瑤華音

奉酬淮南中書相公見寄

并序

皇帝改元之二年余與趙公同制入輔並為黃門  
侍郎夏五月連拜弘文崇文大學士冬十月招授  
檢校吏部尚書兼門下侍郎彤弓旅矢出鎮西蜀  
後九月趙公加大司馬之秩右弼如故龍旂虎符  
出制淮海時號揚益俱為重藩左右皇都萬里何  
遠公手提兵柄心匠化源芳詞况余情勤靡極質  
文相映金玉鏘然蜀道之阻長楚郊之風物襟靈  
所屬盡在斯矣永懷趙公歲寒交好之情因成詩  
人不可方思之義聊書匪報以款遐心  
揚州隋故都竹使漢名儒翊聖恩華異持衡節制

殊朝廷連受朕台座接訐謨金玉裁王度丹書奉  
帝俞九重辭象魏千萬握兵符鐵馬秋臨塞虹旌  
夜渡瀘江長梅笛怨天遠桂輪孤浩嘆煙霜曉芳  
期蘭蕙蕪雅言書一札賓海鴈東隅歲月奔波盡  
音徽霧雨濡蜀江分井絡錦浪入淮湖獨抱相思  
恨關山不可踰

武構西亭偶題因呈監軍及幕中諸公

瀛海無因泛崑丘豈易尋數峰聊在目一境暫清  
心悅彼松栢性愛茲桃李陰列芳憑有土叢幹聚  
成林信以子牟戀歸歟尼父吟暗香蘭露滴空翠

蕙樓深負鼎位嘗忝荷戈年屢侵百城煩執掌九  
仞喜嶇欽巴漢沂泂揖岷峨千萬岑恩偏不敢去  
范蠡畏鎔金

和楊弘微春日曲江南望

遲景靄悠悠傷春南陌頭暄風一澹蕩遐思幾殷  
憂龍去空仙沼鸞飛掩妓樓芳菲餘雨露冠蓋舊  
公侯朱戟千門閉黃鸝百轉愁煙濛宮樹晚花咽  
石泉流寒谷律潛應中林蘭自幽商山將避漢晉  
室正藩周黍稷聞興歎瓊瑤畏見投君心即吾事  
微向在滄洲

長安秋夜懷陳京昆季

鍾鼓九衢絕出門千里同遠情高枕夜秋思北窓  
空靜見煙凝燭閑聽葉墜桐玉壺思洞徹瓊樹憶  
惹籠螢影踈簾外鴻聲暗雨中羈愁難會面懶慢  
責微躬甲乙科攀桂圖書閣踐蓬一瓢非可樂六  
翮未因風寥落悲秋盡蹉跎惜歲窮明朝不相見  
流淚菊花叢

冬日漢江南行將赴夏口途次江陵界寄

裴尚書

五部擁雙旌南依墨客卿關山迥梁甸波浪接滄

城煙景迷時候雲帆渺去程蛤珠逢月吐蘆鴈觸  
羅驚浦樹疑寒晦江天湛鏡清賞心隨處愜壯志  
逐年輕舟楫不可駐提封如任情向方曾指路射  
策許言兵蘭渚歇芳意菱歌非應聲元戎武昌守  
羊祜幸連營

奉酬中書李相公早朝於中書候傳點偶

書所懷

寥落曙鍾斷微明煙月沉翠霞仙仗合清漏掖垣  
深北極星遙拱南山闕迥臨蘭釭竟曉燄琪樹欲  
秋陰霄漢慙聯步貂蟬愧並簪德容溫比玉王度

或如金魚水千年運簫韶九奏音代天驚度日擲  
地喜開襟文武時方泰唐虞道可尋忝陪申及甫  
清淨奉堯心

甲午歲相國李公有北園寄贈之作吟翫  
歷時屢促酬答機務不暇未及報章今古  
遽分電波增感留慕劔而心許感鄰笛而  
而意傷寓哀冥冥以廣遺韻云

機事勞西掖幽懷寄北園鶴巢深更靜蟬噪斷猶  
喧仙醞百花馥艷歌雙袖翻碧雲詩變雅皇澤葉  
流根未報雕籠贈俄傷劔浪痕佳城關白日哀挽

向青門禮命公台重煙霜隴樹繁天高不可問空  
使輔星昏

和楊二舍人晚秋與崔氏舍人張祕監苗  
考功同遊昊天觀時中書寓直不得陪隨  
因追往年曾與舊僚聯遊此觀紀題在壁  
已有淪亡書事感懷輒以呈寄兼呈東省  
三給事之作楊君見徵鄙詞因以繼和

瑤圃高秋會金閨奉詔辰朱輪天上客白日洞中  
人珮響泉聲雜朝衣羽服親九重青瑣閉三秀紫  
芝新化藥秦方士偷桃漢侍臣玉笙王子駕遼海

令威身嘆逝頽波速緘詞麗曲春重將悽恨意苔  
壁問遺臣

酬李十一尚書西亭暇日書懷見寄

鼎鉉昔云忝西南分主憂煙塵開楚道旌節護蠻  
陬任重功無立力微恩未酬據鞍慙齒髮責帥懼  
春秋高德聞鄭履儉君稱晏裘三刀君入夢九折  
我回輶時景屢遷易茲言期退休方追故山事豈  
謂台堦留遐抱清淨理眷言蘭杜幽一緘瓊玖贈  
萬里別離愁巴嶺雲外沒蜀江天際流懷賢耿遙  
思相望鳳池頭

秋懷奉寄朱補闕

上苑繁霜降騷人起恨初白雲深陋巷衰草遍閭  
居暮色秋煙重寒聲牖葉虛潘生秋思苦陶令世  
情疎已製歸田賦猶陳諫獵書不知青瑣客投分  
竟何如

奉酬中書相公至日園丘行事合於中書  
宿直移止於集賢院叙情見寄之什

郊廟祇嚴祀齋莊覲上玄別開金虎觀不離紫微  
天樹古長楊接池清太液連仲山方補袞文舉自  
傷年風溢銅壺漏香凝綺閣煙仍聞白雪唱流詠

滿鵝絃

途次

去國策羸馬勞歌行路難地崇秦制險人樂漢恩  
寬御沼澄泉碧宮梨拂露丹鼎成仙馭遠龍化宿  
雲殘不問三苗寵誰陪萬國歡至今松桂色長助  
玉樓寒

題故蔡國公主九華觀上池院

朱門臨九衢雲木藹僊居曲沼天波接層臺鳳舞  
餘曙煙深碧篠香露濕紅蕖瑤瑟含風韻紗窓積  
翠虛秦樓今寂寞真界竟何如不與蓬瀛異迢迢

遠玉除

酬嚴維秋夜見寄

遙夜思悠悠聞鍾遠夢休亂林螢燭暗零露竹風  
秋啓戶雲歸棟寒簾月上鈎昭明逢聖代羈旅別  
滄洲騎省潘郎思衡闈宋玉愁神仙慙李郭詞賦  
謝曹劉松栢應無變瑤瑤不可酬誰堪此時景寂  
寞下高樓

途次近蜀驛蒙恩賜寶刀及飛龍借馬使  
還奉寄中書李鄭二公

草草事行役遲遲違故關碧幃遙隱霧紅旆漸依

山感激酬恩淚星霜去國顏捧刀金錫字歸馬玉  
連環威鳳翔雙闕征夫縱百蠻應憐宣室召溫樹  
下同攀

歸燕

春色遍芳菲間簷雙鷺歸還同舊侶至來遶故巢  
飛敢望煙霄達多慙羽翮微啣泥傍金砌拾蒞到  
荆扉雲海經時別雕梁長日依主人能一顧轉盼  
自光輝

送許著作分司東都

瑤瑟激悽響征鴻翻夕陽署分刊竹簡書蠹護芸

香馬色關城曉蟬聲驛路長石渠榮正禮蘭室重  
元方不作經年別離魂亦暫傷

聞相公三兄小園置宴以元衡寓直因寄

上兼呈中書三兄

休沐限中禁家山傳勝遊露寒潘省夜木落庾園  
秋蘭菊迴幽步壺觴洽舊儔位高天祿閣詞異畔  
牢愁孤思琴先覺馳暉水競流明朝不相見清祀  
在園丘

酬陸員外歙州許員外郢州二使君

吳洲雲海接楚驛夢林長符節分憂重鷓鴣去路

武元衡集卷上  
三十一  
翔艷歌愁翠黛寶瑟韻清商  
州草遙池合春風曉  
旆張晉臣多樂廣漢主識馮唐  
不作經年別離魂  
亦未傷

武元衡集卷上

武元衡集卷中

五言律詩

西亭早秋送徐員外

鼎鉉辭台座麾幢領益州  
曲池連月曉橫角滿城  
秋有美皇華使曾同白社  
遊今年重相見偏覺艷  
歌愁

送徐員外還京

九折朱輪動三巴  
白露生蕙蘭秋意晚  
關塞別魂驚寶瑟連宵怨  
金壘盡醉傾旄頭星未落  
分手輶轡鳴

送柳郎中裴起居

沱江水綠波喧鳥去喬柯南浦別離處東風蘭杜  
多長亭春婉婉層漢路蹉跎會有歸朝日班超柰  
老何

八月十五日酬從兄常望月有懷

坐愛圓景滿况茲秋夜長寒光生露草夕韻出風  
篁地遠驚金奏天高失鴈行如何北樓望不得共  
池塘

酬太常從兄留別

鄉路日茲始征軒行復留張騫隨漢節王濬守刀

州澤國煙花度銅梁霧雨愁別離無可柰萬恨錦  
江流

春日與諸公汎舟

千里雪山開沱江春水來駐帆雲縹緲吹管鶴徘徊  
身外流年駛樽前落景催不應歸棹遠明月在高  
臺

送兄歸洛使謁嚴司空

六歲蜀城守千莖蓬鬢絲憂心不自遣骨肉又傷  
離楚峽饒雲雨巴江足夢思殷勤孔北海時節  
移

同洛陽諸公餞盧起居

蕭條寒日晏悽慘別魂驚寶瑟無聲怨金囊故贈  
輕赤墀方載筆油幕尚言兵暮宿青泥驛煩君淚  
滿纓

臺中題壁

柏臺年未老蓬鬢忽蒼蒼無事裨明主何心弄憲  
章雀聲愁霰雪鴻思恨關梁會脫簪纓去故山瑤  
草芳

江上寄隱者

歸舟不計程江上屢虧盈靄靄滄波路悠悠離別

辱庭梧變葱蒨籬菊揚芳馥墜葉翻夕霜高堂瞬  
華燭况茲寒夜永復歎流年促感物思殷勤懷賢  
心躑躅雄詞封禪草麗句陽春曲高德十年兄異  
才千里足咫尺邈雪霜相望如瓊玉欲識歲寒心  
松筠更秋綠

送唐次

都門去馬嘶灞水春流淺青槐驛路長白日離尊  
晚望望煙景微草色行人遠

七言古詩

秋夜雨中懷友

庭空雨鳴驕天寒鴈啼苦青燈淡吐光白髮悄無  
語幾年不與聯牀吟君方客吳我猶楚

望夫石

佳名望夫處苔蘚封孤石萬里水連天巴江暮雲  
碧湘妃泣下竹成斑子規夜啼江樹白

行路難

君不見道傍廢井傍開花原是昔年驕貴家幾度  
美人來照影濯纈笑引銀瓶縷風飄雨散今柰何  
繡闥雕甍綠苔多笙歌鼎沸君莫矜豪奢未必長  
多金休說編氓朴無耻至境終湏合天理非故敗

鴻桂香隨窈窕珠綴隔玲瓏不及前秋月圓輝鳳  
沼中

四川使宅有韋令公時孔雀存焉暇日與  
諸公同翫座中兼故府賓妓興嗟久之因  
賦此詩

荀令昔居此故巢留越禽動搖金翠尾飛舞碧梧  
陰上客徹瑤瑟美人傷蕙心知因南國使得放海  
雲深

竇三中丞去歲有臺中五言四韻未及酬  
報今領黔南途經蜀門百里而近願言款

觀封略間然因追曩篇持以贈之

在昔謬司憲常僚惟有君報恩如皎日致位等青  
雲削藁書難見除苛事早吟雙旌不可駐風雪路  
岐分

春夜與諸公同宴呈陸三十四郎中

南國宴佳賓交情老倍親月慙紅燭淚花笑白頭  
人寶瑟常餘怨瓊枝不讓春更聞歌子夜桃李艷  
粧新

津梁寺採新茶與幕中諸公遍賞芳香尤  
異因題四韻兼呈陸郎中

靈州碧巖下萸英初散芳塗塗猶宿露采采不盈  
筐陰竇藏煙濕單衣染焙香幸將調鼎味一為奏  
明光

元和癸巳余領蜀之七年奉詔徵還二月  
二十八日清明途經百牢關因題石門洞  
昔佩兵符去今持相印還天光臨井絡春物度巴  
山鳥道青冥外風泉洞壑間何慙班定遠辛苦玉  
門關

夕次潘山下

南國獨行日三巴春草齊漾波歸海疾危棧入雲

迷錦谷嵐煙裏  
刀州晚照西  
旅情方浩蕩  
蜀魄滿林啼

夏日對雨寄朱方拾遺

才非谷永傳無意  
謁王侯  
小暑金將伏  
微涼麥正秋  
遠山歆枕見  
暮雨閉門愁  
更憶東林寺  
詩家第一流

早春送歐陽鍊師歸山

雙鶴五雲車  
初辭漢帝家人  
袞新甲子天路  
舊煙霞  
羽節臨風駐  
霓裳逐雨斜  
崑崙有琪樹  
相憶寄瑤華

長安春望

宿雨淨煙霞  
春風綻百花  
綠楊中禁路  
朱戟五侯家  
草色金隄晚  
鶯聲御柳斜  
無媒猶未達  
應共惜年華

經嚴秘校維故宅

掩淚山陽宅  
生涯此路窮  
香銷芸閣閉  
星落草堂空  
麗藻浮名裏  
哀聲夕照中  
不堪投釣處  
隣笛怨春風

秋夜寄江南舊游

寥落九秋晚  
端憂時物殘  
隔林螢影度  
出禁漏聲

寒愁雨洞房掩孤燈遙夜闌懷賢夢南國興盡水漫漫

送陸書還吳

君住包山下何年入帝鄉成名歸舊業嘆別見秋光橘柚吳洲遠蘆花楚水長我行經此路京口向雲陽

山中月夜寄朱張二舍人

午夜更漏裏九重霄漢間月華雲闕迥秋色鳳池閒御錦通清禁天書出暗關嵇康不求達終歲在空山

送馮諫議赴河北宣慰

漢代衣冠盛堯年雨露多恩榮辭紫禁冰雪渡黃河待詔孤城啓宣風萬歲和今宵燕分野應見使星過

夜坐聞雨寄嚴十少府

多負雲霄志生涯歲序侵風翻涼葉亂雨滴洞房深迢迓三秋夢殷勤獨夜心懷賢不覺寐清磬發東林

資聖寺賁法師晚春茶會

虛室晝常掩心源知悟空禪庭一雨後蓮界萬花

中時節流芳暮人天此會同不知方便理何路出  
樊籠

慈恩寺起上人院

禪堂支許同清論道源窮起滅秋雲盡虛無夕靄  
空池澄山倒影林動葉翻風他日焚香待還來禮  
惠聰

送魏正則擢第歸江陵

客路商山外離筵小暑前高文常獨步折桂及齟  
年關國通秦限波濤隔漢川叨同會府選分手倍  
依然

酬韓弇歸崖見寄

惆悵人間事東山遂獨遊露凝瑤草晚魚戲石潭  
秋軒冕應相待煙霞莫遽留君看仲連意功立始  
滄洲

河東贈別鍊師

多累有行役相逢秋節分游人甘失路野鶴亦離  
群戎馬犯邊壘天兵屯塞雲孔璋才素健羽檄定  
紛紛

秋日將赴江上楊弘微時任鳳翔寄詩別

寂寞兩相阻悠悠南北心燕驚滄海遠鴻避朔雲

深夜夢江亭月離憂隴樹陰兼秋無限思惆悵屬  
瑤琴

夏與熊王二秀才同宿僧院

共將纓上塵來問雪山人世網從知累禪心自證  
真境空宜入夢藤古不留春一聽林公法靈嘉願  
寄身

宜陽所居白蜀葵荅詠東諸公

冉冉衆芳歇亭亭虛室前敷榮時已背幽賞地宜  
偏紅艷世方重素華徒可憐何當君子願知不覺  
喧妍

送寇侍御司馬之明州

斟酒上河梁驚魂去越鄉地窮滄海濶雲入剡山  
長蓮唱蒲萄熟人煙橘柚香蘭亭應駐楫今古共  
風光

送嚴侍御

巴檄故人去蒼蒼楓樹林雲山千里合霧雨四時  
陰峽路猿聲斷桃源犬吠深不須貪勝賞漢節待  
南侵

酬元十二

偶尋烏府客同醉習家池積雪初迷徑孤雲遂失

期風前勞引領月下重相思何必因樽酒幽心兩  
自知

秋晚途次坊州界寄崔玉員外

崎嶇崖谷迷寒雨暮成泥征路出山頂亂雲生馬  
蹄望鄉程杳杳懷遠思悽悽欲識分麾重孤城萬  
壑西

度東徑嶺

又過鴈門北不勝南客悲三邊上巖見雙淚望鄉  
垂暮角雲中戍殘陽天際旗更看飛白羽胡馬在  
封郵

送李正字之蜀

已獻甘泉賦仍登片玉科漢官新組綬蜀國舊煙  
蘿劔壁秋雲斷巴江夜月多無窮別離思遙寄竹  
枝歌

玉泉寺與潤上人望秋山懷張少尹

山寒天降霜煙月共蒼蒼况此綠巖晚尚餘丹桂  
芳禪心樂人世滿秋光莫恠頻回首孤雲思

帝鄉

酬崔使君寄塵尾

賢人嘉尚同今製古遺風寄我襟懷裏辭君掌握

中金聲勞振遠玉柄借談空執玩馳心處迢迢巴  
峽東

送鄧州潘使君赴任

川陸一都會旌旗千里舒虎符中禁授熊軾上流  
居橘袖金難並池塘練不如春風行部日應駐士  
元車

和李中丞題故將軍林亭

帝里清和節侯家邸第春煙霏瑤草露苔暗杏梁  
塵城郭悲歌舊池塘麗句新年年車馬客鐘鼓樂  
仙人

送韋侍御司議赴東都

洛京千里近離緒亦紛紛文憲芙蓉沼元方羔鴈  
群河間連鞏樹嵩少接秦雲獨有臨風思睽攜不  
可聞

送吳侍御司馬赴台州

盧耽佐郡遙川陸苦迢迢風景經吳會文章變越  
謠煙林繁橘袖雲海浩波潮余有靈山夢前君到  
石橋

送七兄赴歙州

車馬去憧憧都門聞曉鐘客程將日遠離緒與春

濃流水踰千度歸雲隔萬重玉杯傾酒盡不換慘  
悽容

德宗皇帝挽歌詞二首

道啓軒皇聖威揚夏禹功謳歌亭育外文武盛明  
中月光連壁烟塵屏大風爲人祈福處臺樹與  
天通

聖曆 勤政瑤圖慶運長壽宮開此地仙駕渺何  
鄉風斲清笳調雲愁綠旆揚上升知不恨弘濟任  
城王

順宗至德大聖皇帝挽歌詞三首

橋山同軌會軒后葬衣冠東海風波變西陵松栢  
攢鼎湖仙已去金掌露寧乾萬木泉扃月空憐鳧  
鴈寒

容衛曉徘徊嚴城闔闔開烏號龍馭遠遏密鳳聲  
哀崑浪黃河注崦嵫白日頽恭聞天子孝不忍望  
銅臺

哀挽渭川曲空歌汾水陽夜泉愁更咽秋日慘無  
光纘夏功傳啓興周業繼昌回瞻五陵上煙雨爲  
蒼蒼

昭德皇后挽歌詞

武元衡集卷中  
三十一  
玉宸將遷坐金鷄忽報晨珮環僊馭遠星月夜臺  
新劍沒川空冷菱寒鏡不春國家車馬會多是濯  
龍親

武元衡集卷中

